

SOALAN NO: 20

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : DATO' FAUZI BIN ABDUL RAHMAN
[INDERA MAHKOTA]**

TARIKH : 25 MAC 2014

SOALAN :

Dato' Fauzi bin Abdul Rahman [Indera Mahkota] minta **PERDANA MENTERI** menyatakan adakah Kerajaan bersedia bermuzakarah bagi kepentingan rakyat dan negara, mencari titik pertemuan bagi menyelesaikan beberapa masalah genting negara, seperti bebanan hutang negara yang meruncingkan; bebanan rakyat disebabkan kenaikan harga barang asas; ketegangan antara kaum dan agama; keketaraan jurang perbezaan hasil pendapatan antara yang kaya dengan yang miskin, dan lain-lain isu nasional yang mendesak.

JAWAPAN: YB DATO' SERI DR. SHAHIDAN BIN KASSIM
MENTERI DI JABATAN PERDANA MENTERI

Tuan Yang di-Pertua,

Untuk makluman Ahli Dewan, Kerajaan telah berusaha sedaya mungkin dalam membina hubungan baik dengan semua pihak dan golongan, termasuklah negeri-negeri yang dikuasai oleh parti pembangkang. Sebagai contoh, Kerajaan Pusat telah mengadakan pertemuan dengan Menteri Besar dan pimpinan Kerajaan negeri Kelantan, bagi merintis jalinan kerjasama dalam usaha membangun dan memajukan negeri tersebut.

Kerajaan Pusat juga telah mengadakan Memorandum Persefahaman atau MOU untuk penstrukturkan semula industri air, yang ditandatangani oleh Kerajaan Persekutuan dan kerajaan negeri Selangor dalam menyelesaikan isu air yang telah berlanjutan sejak 2008 lagi, demi kepentingan rakyat dan kemajuan bersama. Malah baru-baru ini, Kerajaan telah merasmikan projek jambatan kedua Pulau Pinang, yang kemudiannya diumumkan sebagai Jambatan Sultan Abdul Halim Mu'adzam Shah. Inisiatif ini yang dimulakan oleh Kerajaan Persekutuan, walaupun negeri Pulau Pinang ditadbir oleh pembangkang.

Sehubungan dengan itu, Kerajaan Pusat terbuka bagi mengadakan rundingan dengan mana-mana pihak selagi ia diadakan untuk kepentingan masyarakat dan bukan bagi keuntungan individu semata-mata.

Sekian. Terima kasih.